

**■ COLUMNA**

# Jau laud tai – ti laudas mai

DA MARIA CADRUVI

Jau ses al computer ed hai d'emplenir ora in formular cun il titel «Selbstreflexion». Quai suenter ch'jau hai manà ina gruppà tras la citad da Glion. Sis personas eran sa participadas a «mia» visita guidata. L'aura era stada bella quel di e durant la tura aveva quai dà dus moments magics, nunspegtgads – cun musica. Ils giasts avevan ditg alla fin ch'i saja stà interessant. Ed ussa, sco ditg, er'jau al computer ed avess gi d'emplenir ora quest formular per il Museum Regional Surselva ch'organisescha e coordinescha las visitas guidadas da «mira!cultura».

Laud da sasez toffa – ma vai tras il chau. Pleds ch'jau hai udi savens d'uffant, cunzunt da mes bab! Da lez temp paupra/guai, sch'ins ludava sasez. Ils blers uffants na vegnivan dal rest era betg ludads dad auters – ni dals geniturs, ni dals scolasts, ni dals plevons. Cun famiglias da tschintg, diesch ed anc dapli uffants avess quai franc dà blers e per part era bels lauds. Ins ludava il Segner e la creaziun. Oz va la tendenza en l'otra direziun. Tscherts uffants vegnan ludads per mintga toffa. E las medias socialas gidan a cultivar la cultura



dal «mira jau!» tar grond e pitschen.

Dastg'ins insumma ludar sasez – ma vai tras il chau. Pli baud devi las sgnoccas cun dumondas a radio Eriwan. Las respostas eran adina: Da princip gea, però/aber ... Radio Eriwan avess forsa ditg: Da princip dastg'ins ludar sasez, però sulettamain sche naging n'auda. Ubain: Ins dastga, però sulettamain sche la proporziun tranter laud e critica è in a dus – en favur da la critica. Meds e meto- das per recaltgar laud hai natiralmain dà gia adina. Ina ha fatg rir mai e mes collegas da lavur pli baud bleras giadas. Nus avevan l'impressiun che questa metoda saja bain derasada en il mund rumantsch: Jau laud tai, ti laudas mai – quant bel è quai! Ma per dir la verdad: Igl è bel e fa era bain sche l'auter stima ed appreziescha quai ch'ins

fa. Deplorablmain vegn la regla dal dar e survegnir mintgatant sut las rodas. Ins prenda pli gugent che da dar – era cura ch'i va per ludar. Beads quels e quellas ch'èn absolutamain independents ed immuns en connex cun la renconuschientscha dals auters. Jau n'enconusch betg bleras da lezzas personas.

Ma jau enconusch las tendenzas actualas che laudan il laud da sasez. «Loben Sie sich regelmässig für Dinge, die Sie gut machen» èsi scrit en in dals cudeschs ch'jau hai legi il davos temp. E latiers vegn il cussegl da na betg esser me- mia sever a la tschertga da motivs per ludar sasez. Nua va quai a finir – ma vai tras il chau.

Jau hai lura emplenì ora il formular da la «Selbstreflexion». Dal rest: Visitas e turas da «mira!cultura» cun differents guides e guidas na datti betg mo a Glion, mabain era a Lum- brein, Meierhof, Vella e Vu- orz. Detagls èn da chattar sut «mira!cultura» sin la pagina [www.museumregional.ch](http://www.museumregional.ch). Las turas da 90 minutas èn infurmativas e divertentas – era per indigens. Jau scriv sa chapescha quai senza vulair ans ludar ...

maria.cadruvi@spin.ch